

欽定重修兩浙鹽法志

欽定重修兩浙鹽法志卷十一

奏議二

雍正六年四月戶部爲謹陳鹽政銅弊酌量疏銷等事覆浙江總督兼理鹽政李衛題前事內稱查浙地私鹽出沒之所獨海寧海鹽平湖桐鄉爲最且係嘉湖二府販私門戶而海寧之長安鎮乃其往來適中孔道請專設巡鹽把總一員兵一百名在此鎮分巡隘口歸臣標左營管轄於海寧等四縣及嘉湖要汎接壤江南之處周圍巡查選募勇

健兵丁充當以商人向日雇用巡役之工食給爲
月餉不足者卽以所獲私鹽變價添補請將監生
韓景琦給與把總劄付俸薪帶領各兵巡緝三年
果能有效授以千總職銜仍畱營再緝三年如能
始終不懈各處得以銷引保題到部以守備陞用
另換巡官但恐兵少地廣不能周巡查撫標額兵
八百名可於此中暫爲抽派一百名酌委千把總
一員幫同巡鹽把總協緝令其彼此稽查至出門
船腳盤費卽以商家所出鹽院承差巡費撥給俟

一二月後酌量調換使不致熟識久而作弊等語
均應如該督所請俟

命下之日臣部給與監生韓景琦把總劄付令其帶兵
於海寧等處要汛周徧巡查果能恪共汛守杜絕
販私多銷額引著有成效於三年之後該督照例
具題拔擢以示鼓勵至於地廣兵少或不敷差巡
准該督咨部於撫標弁兵內酌量抽派協同巡鹽
把總彼此稽查一二月後酌量調換仍令該督將
選募巡鹽兵丁花名并監生韓景琦年籍履歷另

造清冊送部查核仍令該督不時查察如有不肖
弁員賄縱私販等弊卽行題叅議處又疏稱各場
員官卑職小唯知利慾熏心萬萬不能改革應將
現任場員分別優劣酌量咨部改補請以捐納候
補候選錄用之同知通判州縣等官如有家道殷
實情願効力者發浙量才分往各場管事專其杜
絕籠丁私煎私賣之責俟三年實有成效卽予保

題請

旨勅部准照原銜卽用在任候憑其不能稱職者題明

休致回籍不准再選倘有仍蹈故轍劣蹟昭著者
題參革職治罪伊等原有身家自能顧惜功名實
心出力等語應如該督所題吏部於候補候選同
知通判州縣等官內有家道殷實情願効力具呈
到部者帶領引

見恭候

欽點命往浙江該督酌量分給各場管理鹽務又疏稱
所轄江南數郡除徽州一屬每年實可多銷其餘
鹽政情形更有與浙不同應爲另行設法者蓋江

南止有松所四場民竈雜居向係就園買食賤鹽
孰肯舍近圖遠加以私鹽橫行商皆虧折消乏棄
業逃避上海南匯二縣數年片引不銷前鹽臣噶
爾泰曾將上海縣令傅之詮參革而壅滯如故臣
雖剴切招商着令買補配銷無如浙商資本微薄
非兩淮富厚可比既不能盡收竈煎之鹽竈戶有
鹽餘剩安能禁其枵腹以待而不肯售與私販莫
若將松所之浦東袁浦青村下砂四場場官於前
項候補同知等官內再選最爲殷實有身家者令

其管理各竈所煎之鹽盡入官倉除商人收買外
餘剩者請借動鹽臣筆帖式歸公成規項下銀兩
交與管場各員照依場價盡數收買再擇商人內
之殷實者將鹽發與領去如能照引數完課聽其
歸完本銀自行配銷倘不能完課則於原本之外
酌量增價些須令其領出分於城鄉市鎮多設店
鋪賣出價銀按季繳還場員卽以此銀源源買發
多出之價作爲盈餘逐年將數目造冊報部查核
此四場事務更爲緊要難辦管理之官三年內仍

行考核保題果能錢糧清楚引鹽多銷上等出衆者以原銜應陞之缺准其卽陞急公稱職稍次者照其原銜卽用倘照舊無益者分別叅革在竈戶鹽旣得售必不定欲賣與私販而梟徒無鹽可買亦可望其改業耕耘且使平素不銷引之縣得以疏銷則歷來多銷之處皆可溢出課額卽管理之各場員先使習學歷練亦可將來臨民有益等語應如該督所請將松所之浦東袁浦青村下砂四場亦准其於

命往同知等官內該督酌量身家最爲殷實者令其管
理仍令嚴飭該管之員不時稽查如有不肖商人
串同梟棍藉設店鋪賣名色囤積販私高擡時價
射利病民等弊卽行揭報將該商斥革照例治罪
其各屬疏銷引目旣經設法疏通應令該督將平
素少銷不銷之處得疏引目若干歷來多銷之處
應增課額若干一并查明分晰造冊具題查核可
也奉

旨依議專設官弁有巡緝鹽梟之責把總微員不足以

資彈壓韓景琦著授千總令其任事六年如六年內
著有成效該督奏聞再加恩擢倘有過失卽當從重
處分欽此

雍正六年五月戶部爲請專道員盤緝帶私之責
以杜透越銅弊事覆浙江總督兼理鹽政李衛題
前事內稱江南蘇松常鎮四府屬縣爲浙引疏銷
最巨之區而京口地方尤爲兩浙行鹽之門戶此
地接壤淮界僅止一江之隔而淮北私鹽片帆可
渡朝發夕至便捷異常始而瓜揚偷渡不過透越

於鎮屬繼且蔓延四出漸至偏達於蘇常甚有北來官差糧座貨物民商各船莫不夾帶淮私運入內港換物發賣以致官鹾恆多壅滯鹽政阻壞亦由於此案查順治十六年間鹽臣遲日巽題請責成鎮江府海防同知並鎮江副將在於沿江閘口躬親巡綽遇有糧艘兵差等項船隻自北進閘者即使登舟盤驗閘口地方建立官廳專責盤查又康熙三十六年間復經鹽臣博泰具題浙西私鹽責成鎮江府海防同知巡緝各在案今盤查之名

雖存而該管文武各官俱不親身盤驗所有官廳
僅存基址形跡經臣屢次嚴飭止差一二兵役在
於彼處虛應故事漫不盤查近聞江北梟販勾通
往來差船並京口旗營駐防及各項大小頭舵水
手無不裝載淮鹽透越進口者或藉稱公差名色
假寫燈籠旗號揚帆竟過不服盤驗或有軟弱勢
微之人稍知畏懼將銀二三錢送與守口兵役卽
任其開行並不過問此淮私之所以日益透越者
實由官不親身臨驗而盤查之法廢弛不行耳仰

請

皇上勅部將鎮江閘口盤驗淮私交與江常鎮道就近專司其事仍令督同鎮江府海防同知並京口將軍標下副將及鎮江城守叅將輪流分班經管不論糧艘兵座大小差船俱必親身盤查如無弊端立卽放行進口嚴禁生事阻撓如有夾帶淮私在船許卽嚴拏詳明道員照律治罪等語應如所請嗣後鎮江閘口盤查私鹽責成江常鎮道督同鎮江府海防同知並京口將軍標下副將及鎮江城

守察將就近分班輪流盤驗無論糧艘兵座大小
差船俱令親身查驗如有夾帶整包私鹽卽行拏
究照興販律治罪其一切水陸私販並嚴飭該管
官弁分頭查拏如有疎縱失察照例叅究仍嚴禁
官弁兵役毋得借拏私鹽名色故意勒捐商民需
索進閘使費倘該道員不能實力整頓或有挾私
而不能查拏或兵役勒索而不能懲禁該督卽行
指叅俱照例議處俟

命下之日行文浙江總督及江南江西總督蘇州巡撫

京口將軍一體遵行奉

旨依議盤查私鹽著該管官員實力奉行毋得虛應故事並令江南巡察御史不時訪察欽此

雍正六年八月吏部爲遵

旨議覆事七月二十一日奉

旨大使管理鹽務關係錢糧若職任卑微不足以彈壓商竈其應揀用何項人員及量加品級之處該部定議臣部查本年三月內浙江總督李衛題請揀選人員辦理場務續經臣部將楊維清等二十三員揀

卷二十一
選引

見命往又於六月內奉

上諭管理鹽務之人與河工効力事同一轍不若照河工例就本省或他省內有果係人去得而家道殷實者令其赴總督衙門具呈著李衛詳加揀選具題委用如李衛有確知灼見之人亦令其調取赴浙具題委用欽遵在案今學士繆沅巡鹽御史鄭禪寶等奏稱大使一員職微任重皆由吏員銓選甚難得人

請

旨勅部揀選等語查品級考內開鹽課大使鹽引批驗
大使俱係未入流今臣等酌量給與正八品職銜
與按察司知事府經歷縣丞等官一體較俸陞轉
其揀選人員除縣丞品級相當外餘俱以原銜管
大使事仍照原銜陞轉至各省現任大使令該督
撫鹽政詳加甄別有在任廉幹勤慎剔除鹽弊者
准其保題以所定品級畱任保題之後如該大使
有貪劣款跡一經發覺卽將原保題之上司照濫
舉匪人例議處其僅係尋常供職者照無任可到

之例仍畱本省遇有未入流之缺咨部改補庸劣者卽行咨革如此則辦理場務得人於鹽政實有裨益奉

旨依議欽此

雍正六年八月戶部爲續陳辦理鹽法事題覆浙江總督兼理鹽政李衛題前事內稱查松郡原係商人不肯開店之處而雲南福建皆有文武官弁督銷之例莫若將公項所收鹽斤量行發交提標五營挑選誠謹于把總在於松郡城之內外監賣

除出完課將鹽本解完源源接續則既予以責成
又不無稍有餘利自必實力巡緝臣仍與提臣時
常酌心稽查庶銅弊可除但產鹽之四場臣旣俟
委官到日遵照辦理酌量收買發商完課儘力督
銷自然有益惟所慮者崇明一邑向係海外包額
之區煎出鹽斤止爲本地民食例禁不許透越別
縣充斥內地後漸產鹽日多梟徒勾通鎮兵縣役
任意廣煎不但往來領餉運米船隻順便裝載亦
且渡海各船夾帶進內殆無虛日文武衙門向來

皆有陋規屢次行文從不攔阻昨見臣在松江恐
被差員內港截拏始據該署縣祖秉震報獲一起
近日鎮標左奇兩營盤鹽甚屬上緊但恐不能久
遠如此若不派官協巡稽查堵禦則蘇松常鎮等
屬雖收餘鹽發商終被崇明廣產私煎攘奪引目
仍舊難銷臣愚昧之見將現在

命發管場各員內挑選明白強健者一人再派千把總
一員發給盤費專在崇明要口駐劄並可往來稽
察竈地其鹽應禁者嚴禁應收者酌收令其轉運

發商辦課其私販小則移知營縣協緝大梟就近
稟報總兵嚴拏解交蘇松道審究分別治罪翦除
窩頓毋許流入內地實於江省鹽政大有裨益至
浙之寃處二府尚有官鹽一半台溫壅引久不行
銷此非專係私販衆多之故實緣梟棍強橫動成
命案各商但有本錢者俱不肯被處貿易現在止
有消乏數人每家不過三二百金大處不能行運
始向此等地方賒欠龍鹽拉扯零賣搜索微利臣
前疏業將四府場員亦在更換准行之內宜一體

動項廣收發給官商分頭運銷於產鹽多處添造
廄座出入要路堵防隘口一有成效增課何止加
倍卽如從前諸義浦等縣梟徒潑橫難治之地業
已漸次斂跡大銷引目此其明驗奉

旨怡親王張廷玉蔣廷錫議奏查浙江鹽引之壅滯皆
由梟棍販私營兵窩匿所致今該督李衛請於松
江府屬之華婁奉賢金山四縣將公項所收鹽斤
量行發交提標五營選擇誠實千把總監賣旣予
之以責成又令其稍獲餘利自必實力巡緝且協

同提臣不時稽察則營兵窩私之弊自可漸除其
崇明一縣於

命發管場人員內揀選一員再派千把一員在要口駐
劄往來稽察以杜夾帶外運則鹽梟販私之弊亦
可漸止其浙江之寧處溫台四府更換場員動項
廣收鹽斤給發官商銷運以招徠商販嚴禁私梟
則正課可以漸增均應如所請令該督乘今年秋
冬之時悉照所奏速行辦理奉

旨依議速行欽此

雍正六年十一月戶部爲題定起解鹽課京餉之規以重帑項以除銅弊事題覆浙江總督兼理鹽政李衛題前事內稱浙江省歷來所收鹽課公費各項錢糧俱係商竈自行傾鎔小錠交納卽以原銀起解較之藩庫京餉元寶成色不能盡一本年二月內所解鹽課等項銀三十六萬餘兩奉部以內有九八等色銀摺雜題叅照例議處荷蒙

皇上天恩格外從寬止將臣銷去紀錄一次免其罰俸鹽驛道王鈞銷去加一級抵其降調其就京領銷

折耗銀兩著落王鈞自行解補今又有部撥起解
銀一十九萬二千餘兩王鈞以庫內收存原銀俱
與從前一例若照近奉部估九八之色每兩加銀
二分傾銷起解或恐仍有未合隨於補色二分之
外又每兩多加銀一分以爲人工炭火飯食等項
折耗之需在於道署大堂委令庫官庫吏設鑪鎔
化按數計算宜無不足之色矣乃今正在釘鞘起
程之際該道細察成色尚有未足向臣面稟臣親
加估看雖比從前小錠之式已改成五兩大錠而

其色終覺未佳當交該道領回會同署臣標中軍
台協副將吳進義杭州府郭朝端公視再銷數錠
實止九八五色若照元寶核算成色每兩仍缺一
分五釐其中自有情弊因將管庫官吏發審嚴加
訊問銀匠隨據供出伊等於該道每兩加銀三分
之內庫官定要分銀五釐估色兌平之庫吏二名
每人各分銀五釐皆與銀匠通同令其暗中代爲
扣取卽去人工炭食而匠人於折耗之內亦不無
餘潤是所加三分之中竟有一分六七釐爲衆人

分肥似此飢法欺公實爲藐玩極矣除將庫官高士鳳若部斥革同庫吏銀匠等飭發按察司嚴審究擬從重治罪所扣之銀照數追出仍行添補侵去成色將已經傾就銀兩再令鎔化元寶起解外但積習相沿若仍聽其俱用小錠恐通同減色銅弊難除相應題明嗣後凡鹽課錢糧奉撥京餉俱照藩庫起解元寶大錠色樣庶吏役銀匠難於從中侵漁而錢糧亦有畫一成規再查此案督庫官吏偷減情弊係鹽驛道王鈞自行會同審出其所

扣銀兩現在追還添補傾銷未能卽完并請於常
限外稍寬半月之期不致倉猝再悞等因查前項
撥解京餉銀該督以每兩加銀三分鎔化五兩大
錠其色終覺未佳因將管庫官吏發審嚴訊銀匠
供出前情所扣之銀照數追出添補侵去成色題
請再令鎔化元寶起解應將通同侵扣之管庫官
吏銀匠等行令該督嚴審究擬具題其所撥京餉
一十九萬二千五百二十一兩四錢一分四釐零
現據該督題報傾鎔足色元寶差委永嘉縣縣丞

邱上嵩等於雍正六年八月十六日給批起解應
俟解到之日臣部照數查收發批外至疏稱嗣後
凡鹽課錢糧奉撥京餉俱照藩庫起解元寶大錠
色樣庶吏役銀匠難於從中侵漁而錢糧亦有一
定之成規等語應令該督嗣後凡解京鹽課錢糧
俱照藩庫起解大錠元寶色樣鎔足解部倘仍有
不肖官吏串同銀匠從中侵漁等弊該督察出卽
行題叅可也奉

旨依議欽此

雍正七年四月吏部爲遵

旨題覆事會議得總督管理浙江巡撫事務李衛疏稱江浙兩省從前共有三十三場裁去十處有兩場而歸并一場甚至有一官而管三處者如松江南匯縣之下砂原設三場自康熙四十二年雍正二年兩次并爲一場皆因從前所出引鹽不及額數見今產鹽復廣竈地遙遠自非一官所能稽查周徧又浙江黃巖縣杜濱場於康熙三年歸并黃巖場查杜濱地方山海交錯寬廣百餘里與黃巖南

北相隔又有椒江之險近日丁鈕殷繁一員實難
兼顧又永嘉縣之永嘉南監二場於康熙二十
年歸并雙穗場以三處之竈令引鹽而責一人之
督煎稽緝殊有顧此失彼之虞請將下砂三場原
地酌量中分除頭場有官外復設二場一員其杜
濟一場仍與黃巖分管永嘉則須另立一場以上
共復設場官三員給與印記各自緝私督煎至橫
浦浦東二場俱設金山衛之城外向將橫浦場課
歸并平湖縣徵解但以附城竈戶令赴數百里完

納殊多苦累應請將橫浦場仍歸江南金山縣完
課庶爲得宜兩場相去不過二十里一官足可辦
理并請裁去浦東場官一員以節冗費又寵課向
屬場員徵解因係微職難任錢糧重寄所以改令
縣徵見在場員既皆改用通判知縣州同等官應
仍將各場課銀令場官就近設櫃徵收原封解交
各縣拆并等語均應如所請又疏稱場員惟司代
比催納而完欠解給仍屬於縣若定以考成竟照
經徵一體處分則各員因代縣催比使之詐誤停

陞孰肯踴躍急公臣愚以爲催比場員如有未完
分數除止於罰俸外其應降職降級停陞者俱照
離任官例罰俸一年免其停陞倘催徵不力許該
縣提比經識挪用侵漁者仍卽揭報另行從重議
處如該縣不能稽察致有虧空仍照直隸州之例
叅處著落分賠至有一場而坐落兩縣者場官應
合算未完分數毋庸兩地處分其從前欠課卽令
場員就近察核會縣詳報著追等語查兩浙各場
鹽課錢糧旣令場員就近設櫃徵收原封解交各

縣拆并是代徵之場員并非專管官可比若照經
徵舊例一體處分原屬太過若概將降職停陞者
俱改爲罰俸一年則輕重不分於法亦未允協臣
等請嗣後除專管各員仍照舊例處分外其代徵
場員如初叅欠不及一分者舊例罰俸六個月今
應免其議處欠一分者舊例罰俸一年今應罰俸
三個月欠二分者舊例降職一級今應罰俸六個
月欠三分者舊例降職二級今應罰俸九個月欠
四分五分者舊例降職三級四級今應罰俸一年

俱免其停陞督催至欠六分以上者舊例俱行革職今若止於罰俸則欠數既多而處分太輕又恐場員視為泛常代徵不力臣等請嗣後欠六分者降職一級欠七分者降職二級仍令戴罪督催欠八分以上者卽行革職再初叅處分既已改輕則原叅各官亦不便仍照舊例議處臣等并請嗣後代縣催比之場員原欠不及一分年限內不全完者舊例降一級畱任今應罰俸六個月原欠一分年限內不全完者舊例降三級調用今應罰俸二

年原欠二分三分年限內不全完者舊例降四級五級調用今均應降一級畱任再限一年督催如再不完照所降之級調用原欠四分五分年限內不完者舊例革職今應降一級調用原欠六分以上年限內不全完者革職如該場員催徵不力許該縣提比經識倘將已徵錢糧內有挪移侵欺情弊卽行揭報照挪移侵欺例分別處分若該縣平時不能稽察查揭致有虧空別經發覺者將該縣照直隸知州失察屬貞虧空例議處至有一場坐

落兩縣者其場員兩地未完分數應合算并案處
分再從前未完課項卽令各該場員就近查明會
縣詳報著追又疏稱仁和許村二場向日惟係鹽
驛道所轄不由分司稽考但道員事繁難以親自
查覈請將二場歸於寧紹分司管轄仍聽鹽道統
屬請裁之浦東場俸工原係江南地方應抵補復
設之下砂二場毋庸另增其浙江之杜瀆永嘉兩
場官役俸工照舊額給等語亦應如該督所請遵
照施行可也奉

旨依議欽此

雍正七年六月戶部爲請頒額外預備引目以資
疏銷事題覆浙江總督兼理鹽政李衛奏稱兩浙
鹽務歷係壓銷二季每逢春夏掣驗僅可行銷上
年秋冬之引臣兼理以來雨暘時若場鹽廣產文
武同心竭力緝私梟風漸息引地得以疏通商皆
樂於買補又發帑儘收竈戶賣剩餘鹽給商配掣
在向不銷引地方運賣以濟民食因此額引較前
預銷二季但上年場有餘鹽乏引配運應將所存

之肩票陞課改銷近今肩引亦復廣售而預提引
目一時不能接濟是以設法變通暫執印照捆鹽
赴所掣驗現令停泊河干候領新引到浙給商抵
補開賣但給照赴掣不過一時權宜未可據以爲
例此時若竟請加引則日後行銷未及必致貽累
商釐而聽其積鹽不收則私梟復萌請預爲頒給
額外引目十萬道發浙貯庫應用其年月季分暫
停預定每於掣期額引配足之外如遇場有餘鹽
准令商人完納課費呈明請領現填某年某季發

給配銷原係額外多備之引聽憑各所之商通融
配掣倘一年期內尚不敷用再行咨部請領若有
餘剩報部存俟下年續銷盈絀隨時不在額定考
成限銷攤賠之內仍於每年奏報時將銷引若干
道增出課費若干兩附同奏冊一體造送聽候查
核再如富陽德清嘉秀善桐諸義浦等縣及江南
松江所屬沿海之區從前原係住賣引地久被私
梟佔去除嘉秀善桐些須銷售此外各縣地方片
引不行每年課餉俱係改撥攤補均賠近今竭力

禁逐設法調劑已令商人配運住賣頗見成效但向來多食私販賤鹽倘商本太重鹽價稍昂又於民情未便是以臣斟酌通融凡此數縣行銷引目課餉照數完納外其每引公費雜費酌量多寡稍爲減免將鹽價令其比別處每斤賤賣使官引得銷價值仍減民間樂於盡赴商買私販便可永杜等語查河東自雍正三年爲始每年預發餘引十萬道如遇額引不敷之處令運使填給照例納課將已行餘引儘數題報存剩餘引仍繳內部遵行

在案今兩浙請頒額外引目十萬道應如該督所請照依河東預發餘引之例自雍正七年爲始臣部每年照數刷印令該督按年差役赴部承領到浙貯庫每於掣期額引配足之外准令商人呈領配賣餘鹽照所領數目完納課餉均於歲底卽行繳部仍於每年奏銷之時將所銷引目增出課費一同造冊報部查核并令該鹽道將此項額外引張商人呈領數目通融配銷地方俱按引填註鈐蓋印信給發該地方官驗明銷售其從前該督所

給印照於部引頒到之日迅速解部查銷至所請
每引公費雜費酌量減免鹽斤價值亦量爲稍減
均應如該督所請仍令將減免各數報部查核可
也奉

旨依議欽此

雍正八年七月戶部爲敬陳鹽法相沿陋弊酌議
調劑清釐事宜仰祈

睿鑒事題覆浙江總督兼理鹽政李衛疏稱鹽課錢糧
額徵款內有各州縣功績等銀七千八百一十五

兩滴珠銀七十八兩一錢五分內除各縣地丁項
下編徵抵課水手銀九百九十二兩五錢五分九
釐有款可徵外其餘銀六千九百七十兩五錢九
分一釐並無原款可徵此項課銀派於各州縣解
納照縣分大小分別多寡限定一年獲變私鹽船
物之價起解充餉少者罰令賠出在州縣以爲有
款無徵又皆責之鹽捕弓兵賠墊完納此項錢糧
久列額徵款內未便竟請豁除而每年實獲船鹽
變價罪贖等銀又不足七千八百一十五兩之數

再四思維查各處商家本多引少者向係租賃本
少乏商引目配掣每張給銀五六七八分不等今
額外所發餘引俱係給商不須租價止有交部引
張紙硃及往來領繳路費爲數無多臣擬自雍正
八年爲始凡有情願請領餘引之商人每引輸銀
四分內以六釐畱爲紙硃領繳路費以三分四釐
交貯鹽驛道庫所有功績款下銀六千九百七十
兩五錢九分一釐除將每年實獲船鹽變價罪贖
等銀解抵之外其餘不敷數目卽於餘引租價之

三分四釐內補解抵款不復再派各州縣捐解維
是餘引行銷多寡無定若遇銷多之年抵解有餘
卽留爲下年湊解倘有銷少不敷之時於鹽務准
畱應用公費十二萬五千兩內節省之項暫行墊
解俟次年餘引充裕仍行扣完補項務使年清年
款不致虧額至於此外各縣編徵抵課等銀九百
二十二兩五錢五分九釐原係地丁項下之款請
從雍正八年爲始令各縣照編解交藩司解部造
入地丁題銷案內聲明彙算考成毋庸再入鹽政

以滋牽混等語應如所請行又稱歷任鹽臣銷過
殘引例應追出繳部其中或有水火盜賊遺失及
肩挑小販道路碎裂鹹浸漁戶波濤漂沒不能完
全從前每將後任殘引抵數繳送又撥解定限止
有八十日之期而行銷州縣其有一百餘處未能
如期解足故有後引先到者卽行摺解而以續解
之前引反抵後發之引其事不知起自何時至今
數十餘年歷任皆照前例而行臣兼理以來嚴飭
設法清查惟將本任銷過之引隨時追繳貯庫不

許挪移牽混而已往者莫可究詰以前所缺殘引
至今未能追清臣查每年引目數十萬張分散各
處行銷原不能一無缺少在當日初起之時豈能
保無重照之弊今遠年舊引難於影射亦屬無用
謹據實題明將歷任見在者儘數繳銷其已經抵
還別任及實係遺失無著者免其輾轉追究此後
逐年清出次歲遞繳果屬水火遺失肩販漁戶損
壞取具官商印甘各結聲明存案扶同捏結加倍
治罪等語查雍正六年十一月內臣部覆准河東

鹽政題清查雍正三年鹽引案內令嗣後嚴飭各商牙將引目務須小心收藏不得任意疎忽設有遺失之處卽將遺失情由立時報明地方官取具印甘各結轉詳上司報部查核倘於清查繳引時始行具報卽將經手之人照遺失公文律治罪如有捏稱遺失重複影射情弊卽將該商照販私例治罪在案應將兩浙嗣後繳銷殘引悉照臣部題定之例遵行至從前遺失引張浙江省向不報部據該督稱係歷任鹽臣前後挪移墊解迄今數十餘

年莫可究詰是從前已經遺失者自難責其繳銷應令該督將現在者卽行儘數送部如查係實在遺失者取具該管官不致捏飾印甘各結送部遺引免其追究倘有扶同捏結等情卽將官商指名題參分別議處治罪又稱兩浙引課除江南松所外杭所每引徵課銀四錢四分零嘉所每引徵課銀四錢二分三釐零紹所每引徵課銀三錢四分零在當日原因地方衝僻行銷難易分別等差酌定課則今各處私鹽漸少官引疏通完課似應畫

一臣經飭行鹽驛道王鈞委令寧紹嘉松兩分司
傳集各所衆商公同酌議三所引目通共五十八
萬八千七百六十七引七分五釐課銀二十三萬
四千二百二兩一錢四分九釐零照額攤算杭嘉
紹三所每引均納課銀三錢九分七釐零使額課
均平不致偏有輕重羣情允洽相應一并題明均
於本年遵照奉行又稱前任鹽臣噶爾泰題定每
引輸腳價七釐乃就年額八十萬引目計算今臣
題請之餘引係額外之款不入考核已有每引六

釐爲紙硃路費不復另輸腳價以滋重複等語均應如該督所請可也奉

旨依議欽此

雍正八年五月戶部爲再懇續頒餘引以速配銷事議覆浙江總督兼理鹽政李衛疏稱兩浙年行引目除票引外額銷正引七十一萬三百道雍正七年分掣驗商鹽其有一百二萬二千六百五十七年分掣該年額外七十一萬三百引內除六年冬掣已經預提透銷過一十六萬六千四百五引外僅

存本年引目五十四萬三千八百九十五引同前
請發餘引十萬道因未足用又於上年十二月內
題請餘引二十萬道今尚不敷引目一十七萬九
千有奇理合題請再發餘引十八萬道到浙配銷
雍正七年已掣全數其應完課費銀兩核明造冊
奏報但此項餘引原於年額之外溢銷並非每歲
一定之數盈縮難以預期所增正課公費并請額
外銷算不入考成之內稍有餘剩之引遵例送部
繳銷等語應如所請將兩浙雍正七年分鹽引再

發十八萬道臣部照數刷印給發行令該督轉發
該商運鹽辦課其所增課費銀兩准其額外銷算
造冊奏銷如有餘剩之引卽行繳部可也奉

旨依議欽此

雍正十年七月大學士張廷玉等爲遵

旨速議事據原任浙江總督今署理直隸總督事務李
衛將原在浙江額外節省盈餘銀兩撥充公用各

款奏請

吏部存案等因內稱衆商公備減存雜費銀十二萬五

千餘兩原係伊等各項公事支銷不入奏冊向因
甲商自收自用所費不費臣爲設法調劑凡有支
用量爲折減是以每年遞有節省雍正七八九年
內通共約有十三萬餘兩如各處修葺城垣建築
隄塘等項緊要公事俱未動用公帑將此額外節
省浮費湊撥辦理署督臣可於各案造冊送部查
考等語應令署直督李衛將前項節省銀十三萬
餘兩按年分晰每年節省若干其修葺城垣建築
隄塘等項公事動用銀數按款查造并令署浙督

程元章將現存銀兩一并咨報存案又稱杭城總督舊署年久坍損查鹽務內商買竈鹽向有秤頭并餘剩零鹽變出價銀又在溢額盈餘之外將此修理督署原估銀七千餘兩今稍有未敷於九年秤頭鹽內撥補竣日聽署督查實核銷等語應如所奏并行令署督將動用銀兩核實報部存案以上各項俱係李衛於浙省任內額外節省盈餘銀兩應令程元章亦照例辦理并將現存銀數及嗣後節省盈餘如遇地方緊急公務湊撥辦理之處

一面動用一面卽行奏明於年底將支存款項彙冊具奏交部查核奉

旨依議欽此

雍正十二年三月戶部爲遵

旨議奏事據浙江總督管理鹽政事務程元章疏稱靖江縣逼近淮揚而從前題明包納浙課不歸淮屬者誠以靖江以南俱係行銷浙鹽若以運銷淮鹽則蘇常引地盡爲淮私透越今浙商楊恒裕旣承認行銷靖江食鹽自應仍歸浙江省至於現在包課

銀五百八十九兩零係照下下則例算引二千二百六十九道今該縣戶口繁盛暫以三千引爲率在於每年餘引照數配運但浙鹽路遠費繁難同淮鹽科則應請仍照下下則例每引完課銀二錢五分九釐零共完課銀七百七十八兩八錢三分零倘銷不及數責商賠補額數有增再行陞報等語應如所請將靖江食鹽仍歸浙江省銷售每年加引三千引在於兩浙餘引內暫行配運俟銷有定數卽請頒額引行銷按年照數徵收造入鹽課奏

銷案內具題查核又稱靖邑與通州場竈接壤向食淮私今既運浙鹽應專令文武員弁協力稽察添設巡役分路查緝所需工食商人自行捐給緝獲私鹽照例充餉其一切審詳私鹽案件仍由浙江省鹽政衙門管理所有三江營同知巡緝核轉之處題明更正等語查靖江縣雍正十年二月內據兩江總督高斌奏准令三江營同知兼管總緝私梟案件令該縣詳報核轉在案今既行運浙鹽應令該督飭令靖江縣文武官弁協力稽察添設巡

役姓名并捐給工食銀兩數目逐一分晰造冊送
部查核所有從前奏准令三江營同知巡緝核轉
之處相應准其更正至疏稱淮鹽已經運賣應請
撤回令浙商楊恆裕運鹽接銷包課銀兩請於雍
正甲寅年豁除等語應令該督將已運淮鹽速飭
撤回令該商楊恆裕運鹽接銷并照例取具該商
身家殷實不致悞課印甘各結送部其靖江縣包
課銀兩應請豁除之處查該縣每年已增引課銀
七百七八兩零所有從前包課銀五百八十九

兩三分二釐零相應准其自雍正甲寅年爲始概
行豁除倘有不肖官吏私收情弊卽行指名題叅
分別究治可也奉

旨依議欽此

雍正十三年十一月戶部爲敬陳鹽政要務恭請
聖訓事議覆總督銜管浙江巡撫原管兩浙鹽政程元
章疏稱管理兩淮鹽政布政使臣高斌請將淮鹽
接界鹽店移置城市一案查浙江行銷口岸惟徽
州廣信府屬各縣並常山溧陽建平丹徒金壇及

靖江等縣與淮界接壤各商領引配銷向皆因地
制宜相度民居稠密之處四散設店以濟民食其
附近人民亦並樂有官店隨時可以零星赴買不
廢生業循行已久商民均便今若撤回城市則店
鋪聚會一處引鹽壅積銷售維艱商本漸難轉輸
課餉因虞缺誤且鹽爲日用必需之物其在有力
之家或能遠涉城市整頓買備若日趁貧民時需
時買就近既無官店動須往返奔馳勢必貪食私
鹽奸宄之徒借此更易於販售雖竭力查禁恐難

保其絕迹是近淮之境移店城廂非惟不便於民食抑且有虧於浙課況梟販人等得以乘間行私卽淮鹽界內亦恐日久受累臣愚以爲淮浙銷引官店均屬承辦

國課凡係接壤地方應請仍聽各商照舊開設惟有嚴飭文武官弁督率兵役實力查緝各巡各地各銷各引庶奸梟無從起覬覦之端而鄰境亦兩杜透越之弊矣應如所請并令管理兩浙鹽政浙江布政使張若震飭令各商各銷各引毋致侵越並

嚴飭文武官弁督率兵役實力查緝如有多積鹽
斤結梟興販等弊卽行申報按律究治倘該管官
失於覺察事發之日一并指叅交部議處可也奉
旨依議欽此

乾隆元年六月戶部爲遵

旨議奏事題覆大學士管理浙江總督兼理鹽政嵇曾
筠題稱兩浙近竈之地例設票引遠竈之地例設
正引正引地方距竈旣遠是以向無老少籌鹽共
票引地方共計二十四縣內嘉屬之嘉興秀水嘉

善桐鄉四縣每歲附所掣驗與引地一例設店賣
銷餘杭嵊縣奉化三縣並不近竈不設木籌鎮海
平湖二縣亦未設籌其餘石門海鹽山陰會稽上
虞蕭山餘姚鄞縣慈谿象山海寧仁和錢塘等縣
前督臣李衛任內俱設有貧難老少籌鹽每縣一
二十名至百餘名不等仍行照舊辦理外臣仰體
皇上子惠元元有加無已之至意業於另案請發帑銀
十萬兩收買餘鹽以備積貯請於十萬兩內劃出
四萬兩內華亭奉賢南匯金山四縣每場各發銀

三千兩仁和場發銀三千兩許村西路二場每場各發銀二千兩鮑郎海沙蘆瀝石堰清泉穿長六場每場各發銀一千五百兩錢清三江曹娥鳴鶴大嵩五場每場各發銀二千兩共發銀三萬八千兩交場員收買餘鹽分給濱海近竈實在貧難老少肩負貨賣免致對竈交鹽售私偷販等弊其下剩銀二千兩俟辦有頭緒再行酌量發收但事屬剏始若不定以章程則爭端易起臣查察情形當以場分之大小銷地之廣狹定給籌之多寡每逢

三六九日令場員會同該縣佐雜官一員於卯辰二時在廩監放每名准給二三十斤至四十斤爲準老幼貧難不能負重至遠止許在附近場竈十里之內挑賣不許逾越境外及往城市有引之地與商爭售亦不許令竈丁代挑用船裝載致滋影射如有故違仍以私鹽論罪將鹽入官其給籌之處則責成有司循例確查親驗取結備籌由道申送鹽政衙門烙發凡年六十歲以上十五歲以下及少壯之有殘疾老年婦女孤獨無依者查明實

在貧難方爲合例若非近竈之人與有親可靠有業可守年力壯盛者不在此列所收之鹽如有商人齎本入場則聽商人收買如商人未到場有餘鹽則令場員將銀發竈收取歸貯待放收鹽之時必藉書役登記照料現在每場僅止數人各有管理鹽課催辦竈糧之責不能兼顧每場應設書辦二名衙役二名更夫二名每日將收放鹽斤出入銀錢數目逐一核算登記所需飯食及一切紙張房租紙筆燈油等項不便議動正項應照竈價每

斤量加一釐除歸本之外卽爲前項飯食紙筆等
需及修厥之用至收鹽存厥不無滯耗零星給發
亦多拆折竈戶未給商人未經捆運之時堆貯場
內原有折耗今官收餘鹽隨煎隨卽交厥應於每
百斤量加滯耗七斤拆折三斤共加十斤庶幾兩
無所虧其在浙江省者責令嘉松分司寧紹分司不
時督察其在松江者令松江府知府海防同知就
近會同分司督察毋使場員短發竈價賤收貴賣
侵虧挪移如有情弊據實揭叅通同徇隱一并叅

究倘場員遇有事故照依州縣之例限兩個月交代造冊出結老少赴廩支鹽准其銀錢並收所賣銀錢按旬解貯縣庫逐月解道每於年底銷算一次至次年再發新帑不許場員將銀久存在場展轉發竈暗中行私漁利如老少殘疾之內或係成丁或有事故令有司查實追籌繳銷另選合例之人領籌頂充等語伏查貧難老少既經設有腰牌木籌該場官果能於赴場買鹽之時實力稽查倘有梟販混冒卽行緝掣則貧難不致拮据而梟販

無從窩固應令管鹽浙督仍照定例辦理其所請
發帑分給各場員收買餘鹽令貧難老少買賣之
處應毋庸議又稱溫台有竈之地共計七縣內惟
黃巖太平寧海三縣各設有貧難老少一百名給
以腰牌每日許赴公店挑賣數十斤照依民間買
價每斤減銀一釐貧難老少將鹽轉售每日可得
數十文儘足餬口其臨海永嘉樂清瑞安四縣尚
未舉行茲蒙

聖恩矜恤邊海無靠窮民自應一體給與腰牌臣請仍

照黃巖太平寧海成規各以一百名爲准令有司悉心甄別非實在貧難老少不得濫給腰牌倘有事故另選充補等語應如所請仍將貧難老少花名一并造冊送部又稱商人自雇之商捕雖係私設奸良難辨原應停止但此輩係壯健有力之人熟悉梟販往來蹤迹每月工食幾及守兵兩分名糧一旦革除數千人頓然失業情極無聊勢將轉成梟販誠有如督臣李衛所云者臣參酌情事有官始有役商人固無設役之理而縣役有限不能

四處查緝商捕亦有難裁之勢查商捕工食俱係
商輸請嗣後將商輸銀兩按季交與該地方官照
數按名給發不許剋扣絲毫此項商捕改爲官役
卽令該地方官造入卯簿同鹽捕一體派差并不
時約束稽查如妄掣平人縱放鹽梟按律治罪等
語應如所請飭令各商將一切商捕報明地方官
造入卯簿以便約束至所稱嗣後商輸銀兩按季
交與該地方按名給發之處查此項銀兩向係各
商自行給發今若責令交官轉給未免紛擾且恐

不無扣剋情弊應仍照舊例聽各商自行交收又此項商捕係商人專爲緝私而設亦未便同鹽捕一體派差致滋分身倘有妄拏平人縱放私梟等弊一經察實卽行按律究治又稱水路之有巡船猶陸路之有馬匹若無巡船則私梟揚帆飛渡兵役在岸徧徧莫能追趕況兩浙引地濱沙帶河巨梟積販多係用船裝載尤藉兵役駕舟巡緝但向日巡船或係商人承造或將所獲私鹽船隻撥給或係兵役自備均未畫一易滋紛擾請將緊要水

陸鹽口必須巡船地方令有司會同營汛逐一確
查責商修整編列字號造冊通報存案以備巡緝
之用所獲私鹽船隻俱變價解抵功績亦不必令
兵役自備致啟藉詞需索之漸至巨商領運官鹽
每有飛渡灌包夾帶情弊鹽引相離卽屬行私應
令巡船兵役一體查拏交與地方官據實訊究按
律定擬其人鹽並獲者亦交有司速審完結不得
株連平人等語應如所請又稱巡查私鹽惟賴兵
役若賞罰不當則兵役志氣易隳不克盡力巡查

臣查閱舊案細加斟酌應以功過之大小定賞罰之次第請嗣後巡鹽兵役能拏大號海船人鹽並獲者將鹽船入官私鹽變價卽於變價銀內賞給十分之四船鹽已經拏獲人被脫逃或未全獲者減賞一半小海船鹽並內河整船載運及商人假公行私與大夥挑販鹽數甚多有能拏獲者將船入官私鹽變價亦於變價銀內賞給十分之三獲鹽不獲人與人未全獲者減賞一半鹽雖獲而鹽數無多者將鹽變價亦於變價銀內賞給十分之

二獲鹽不獲人者將鹽變價賞給十分之一如係
兵丁拏獲全數賞兵捕役拏獲全數賞役兵役同
拏各均分倘兵役圖賞混拏官鹽誣指平人者
照誣告例治罪見有私梟並不上前追獲者兵役
各責四十板革糧革役受賄賣販者照枉法贓計
贓科斷兵役自行夾帶私販及通同他人運販者
照私鹽法再加一等治罪等語亦應如所議分別
賞罰如有混拏誣指等弊應令報明刑部按律分
別究治又稱私鹽出沒梟徒往來以及商人假公

行私全賴地方官弁實力查拏按律懲治始足儆戒向來緝私一道並無鼓勵之方且特鹽政衙門有委巡兵弁每致彼此推諉不能殫力查緝查鹽政衙門派委兵弁寥寥數人設遇夥衆興販豈能勇往直前必須責成專一設法勸懲應令本地文武印汛兵弁互相查緝不得少存推諉之念嗣後如有聚衆販私拒捕殺傷人等案仍循舊例查察外其有奸徒搶奪鹽店及閑鬧場竄等事地方文武官弁不遺餘力卽行拏獲究出主使同夥如獲

犯過半並獲首犯者仍叅疎防照依盜案之例免其處分如獲犯不及一半或不獲首犯者照依盜案例叅處限年紺掣限滿不獲亦照盜案處分如平時漫無約束臨時不卽巡掣有意姑息致長刁風者卽將該管員并題叅照依溺職例革職各犯交與接任官照案緝掣該督巡道府廳直隸州將備不行揭報一并查叅如地方官并整頓有方鹽引疏銷私販斂跡一年之內並無應叅之案者准其紀錄一次三年之內整飭有方鹽引疏銷私販

斂跡並無應叅之案者准其加一級比遇大計之年必查明如無鹽案叅罰方准卓薦若希圖議敘隱匿不報或將大夥之案捏作偶然湊合巧爲開脫一經查出隱匿者亦照盜案例革職巧爲開脫者照失察例處分等語應如所請並令嚴飭所屬實力奉行毋致虛應故事臣部仍行文吏部兵部刑部一體遵照辦理又疏稱鹽務以緝私爲先防範斷宜周密兩浙引地幅員極廣向例松江提臣寧波提臣黃巖鎮臣溫州鎮臣樂清平陽副將俱

分管帑鹽京口江陰副將責司巡緝或俱沿海重
地或當准私要衝并懲

勅下提鎮諸臣就近彈壓嚴飭弁兵加意巡防毋致疎
懈更與鹽政地方兩有裨益等語相應行文各該
提鎮遵照舊例加意巡緝可也奉

旨依議欽此

乾隆三年十一月大學士管理浙江總督兼理鹽
政嵇曾筠奏爲預籌濱海塘埭工程修守事宜仰

祈

容鑒事竊照浙省溫台二郡屬縣多近海濱民間地土全賴塘埭陸疊等工蓄淡禦鹹以資灌溉向因歷久未修盡皆殘缺遂至蓄洩失宜每遇潮汐稍大則鹹水灌入難於播種或雨澤偶稀內河之水不能存蓄則易致乾涸車戽維艱均妨農業臣仰體皇上軫念海疆之至意遼委南河隨帶之諳練工員會同該地方官酌撥充公銀兩相度機宜一律興修約共用銀九千九百餘兩業據溫州道府詳報完竣今年濱海億兆外無鹹潮冲刷之患內獲水泉

灌漑之資早晚兩禾秋收有慶靡不感戴

皇仁均沾樂利矣惟是此項工程若非隨時修補勢必
日漸坍卸終爲民累伏查溫台二郡向有滙耗銀
兩係雍正六年間經前督臣李衛奏明撥帑收買
鹽斤貯入本處官廩給商運銷量加耗鹽以備出
入折耗之用第此項滙耗以發銷之遲速定耗折
之多寡每年計有餘存原無定額該處塘埭等工
若卽於此項閒款內通融辦理足資修守之需既
可不動正項錢糧且省估銷案牘之繁而以公辦

公實於工程有益至每歲應修工段動支銀兩卽令該縣申報鹽道該府加意經理仍報明臣衙門察核以專責成愚昧之見是否有當伏祈

訓示遵行奉

旨著照卿所請行交與盧焯悉心辦理欽此

乾隆四年二月戶部議覆大學士前管理浙江總督兼管鹽政嵇曾筠籲請改歸額引等事疏稱松所未奉加斤之先每引給鹽二百八十五斤計原額九萬一千六百三十三引僅歲銷鹽二千六百

一十一萬五千四百五斤今每引給鹽四百斤除
改歸紹台二所一萬二千引外尚存額引七萬九
千六百三十三引共歲銷鹽三千一百八十五萬
三千二百斤比之原數實多鹽五百七十三萬七
千七百九十五斤鹽數既增價值自減且松所僻
處海濱而鹽斤增至五百七十餘萬斤之多較前
已屬充裕現在減價售食以復還十數年前之原
價實屬兩便其改歸紹所一萬道台所二千道自
乾隆二年爲始入額辦銷等語查松所鹽斤既屬

充裕應如所題將松所鹽引一萬二千道自乾隆
二年爲始改撥紹所一萬道台所二千道入額辦
銷其改撥引張前據浙督嵇曾筠題報各照該所
課則行銷松所該課銀四千三百一十四兩一錢
八分四釐零今歸紹台二所其應完課銀四千五
百二十八兩八錢二分一釐零較之松所計餘銀
二百一十四兩六錢三分六釐零又松所尚該完
公費銀三千兩今改歸紹所一萬道例應完公費
銀二千五百兩其改台所二千道例不輸納公費

所少公費銀五百兩在於台所益餘項下割補清
款等因在案今松所鹽引一萬二千道旣改紹台
二所行銷應令新任巡撫盧焯將紹台二所應完
引課公費并盈餘割補公費銀兩俱自乾隆二年
爲始造入各項奏銷冊內具題查核并將松所鹽
斤現賣價值查明報部奉

旨依議欽此

乾隆四年四月戶部爲遵

旨議覆事據浙江巡撫兼管鹽政盧焯疏稱台溫鎮府

營場以及崇明岱山等處領帑收鹽給發商販配
銷其支放解存各數雖按年造冊題銷然盤查之
法未奉定有章程今請自乾隆三年起台溫鎮府
營場及崇明岱山等處領帑收鹽支放解存各項
均於歲底截數責令文武各官調換盤查以清帑
項所有溫州府經辦帑鹽責令樂清副將盤查樂
清副將暨平陽副將經辦帑鹽責令溫州府盤查
台州府經辦帑鹽責令黃巖鎮盤查黃巖鎮暨長
亭場管鹽守備經辦帑鹽責令台州府盤查松屬

袁浦青村下砂三場經辦營鹽責令三場調換盤查以袁浦場盤查不砂場下砂場盤查青村場青村場盤查袁浦場務各據實結報其松江提標中督收賣帑鹽責令松江府盤查結報崇明縣經辦帑鹽銀係存貯縣庫責令收鹽之委官盤查鹽係委官收貯責令崇明縣盤查浙江提標遊擊經辦岱山帑鹽應聽提督委員盤查結報其各員盤結俱限次年二月送道查核統於該年奏銷案內彙送核題再查經辦帑鹽文武各員如遇交代責令

接任官一例盤查足則結報虧則揭參章程既定
則遞年遵循照辦不特帑項肅清亦免侵挪虧欠
之弊等語查兩浙經領帑銀收買竈鹽支放解存
各項向係管鹽督撫及該管鹽政按年造冊報銷
並無盤查之例其中款項繁多誠恐不無侵挪影
射情弊今道庫正雜錢糧既據該撫奏准照巡撫
盤查藩庫之例責令鹽政察盤而各鎮府營場經
領帑銀亦闕

國賦自應如該撫所請責令就近文武各官調換盤

查倘有隱匿扶同等弊一經發覺照例查叅可也
奉

旨依議欽此

乾隆五年七月吏部爲遵

旨議奏事據浙江巡撫兼管鹽政盧焯疏稱橫浦青龍
嵩玉三場從前原係兩場裁并第查今日情形一
官委難兼轄題准復設應請仍循舊制分爲浦東
龍頭玉泉三場給予印記以昭信守其界址額課
竈舍均照舊時成規分隸管轄其西路一場通計

八圍東西竈舍請自黃灣倉一二三圍起并尖山
以內之四圍及五圍之一二三四五六圍共計煎
竈一百三十八連劃歸新場管轄請於舊倉地方
建署係屬扼要其五圍內之七圍起并六七八圍
共計煎竈一百九十八連仍歸西路舊場管理界
限既清慎巡稽察各有專司其分設新場請以黃
灣命名又三江一場地處山會二邑查三江場署
居西在山陰縣陡亹地方卽就近管轄陳顧新鳳
童家寶益四圍計竈舍一百五十二條分場居東

原有協員舊署在會稽姚家埭地方亦就近管轄
姚家新宣新安偁浦四團計籠舍九十七條其他
滬埠竈課均照團界分管各有攸責緣分場地處
東隅擬名東江場又曹娥一場向分東西兩扇西
扇在會稽縣地方聚有十金賀東塘角等團共竈
五十條歸曹娥舊場管理仍駐劄西扇原署東扇
在上虞縣地方聚有百官雁步東南等團共竈二
十四條歸新設場員管理衙署卽於東扇百官鎮
擇地建造其地有金雞山卽擬名金山場以上分

場各照新名請給印記所有員缺仍照原題請以
王匯宗管理新分黃灣場沈昂管理復設龍頭場
王宏勳管理復設玉泉場王道升管理復設浦東
場其三江曹娥新設二缺查三江分場竈廣鹽多
必得諳員管理查有曹娥場大使易宗瀛明白諳
練籌畫得宜請將易宗瀛調補新分東江場至曹
娥場亦需嫻員經理方有裨益查有鳴鶴場大使
任槐在浙年久熟悉鹽務請將任槐調補曹娥場
所有新分金山場請以部發人員胡宏智補授其

鳴鶴場任櫱調補員缺請以部發人員朱厚植補授所有新分復設各場員下俸銀應請於就近縣分正項內編設每年支給照例報銷至駐劄衙署除原有舊署止須修葺或已坍壞僅存署基者各分別估計工料動項興修其原未建署者請照佐貳等官建署之例每場撥給銀一百六十兩飭令飭造應設攢典門皐馬夫等役照各場之例額設募充所需役食銀兩亦於就近縣分編設支給至崇明巡鹽一缺請照原題仍以張逢泰補授所有

俸銀及應設攢典門阜馬夫請照場員之例一體額設編給其印記卽擬崇明巡鹽大使字樣以專信守等語均應如所請臣部行文禮部照例鑄給印記仍令該撫將各該場分徵課稅數目及建造衙署動用銀兩款預造冊咨報戶部查核可也奉旨王匯宗等依議補授餘依議欽此

乾隆六年六月工部爲奏

聞事據江南總督楊超曾等奏稱二里涇一河係黃浦江宣洩要路田疇資其灌漑舟楫藉以通行亟宜

開放舊壩以順輿情於壩基處所設立木柵一道
中畱柵門二扇一屆六月十二月掣鹽之時依期
封固以防私鹽偷漏等語查從前原任撫臣張渠
以應行拆壩建閘通流水道而鹽政則以應改魚
背石壩多開涌洞民田已受其利私販仍難越渡
各執一見初無定論是以臣部覆令該督撫鹽政
會同確勘妥議今該督等旣經親臨確勘應如所
奏准其開放仍於壩基處所設立木柵一道中畱
柵門兩扇責令婁縣主簿批驗所大使就近管理

撥役看守於冬夏二季掣鹽之時依期封固以防私渡工完據實報銷仍令先行造冊送部查核又稱建柵之後潮汐衝激柵木難免損壞必須酌量歲修并該處拆壩通流泥沙易積亦須歲加撈濬所需物料夫工之費應於蘇州藩庫兩淮匣費及浙江鹽庫畱半餘平銀內每年各動支五百兩給商承辦等語查修柵濬淺所需木植工費諒亦無多每年共需銀一千兩給商承辦不無糜費相應行令該督等斟酌辦理據實報銷如有餘剩畱爲

下年之用可也奉

旨依議欽此

乾隆七年六月浙江巡撫兼管鹽政常安爲奏明
鹽務事竊查引費一項係部科飯食各衙門心紅
紙張請領引目起解殘引巡緝私鹽賞給兵役各
項工食路費及商眾一切雜用俱在此內動支前
鹽臣謝賜履任內按款核實奏存銀一十二萬五
千六百餘兩各商自捐自用迨至雍正六年間督
臣李衛以商派未公責成鹽紹嘉松二分司經理

出入用款仍循其舊遞年以來存有節省皆充公用辦理地方有益諸務及海塘工程乾隆元年前閣臣嵇曾筠因場鹽少產價值昂貴籌輕鹽本又將引費款內奏減四萬二百二十兩零止存銀八萬五千三百九十餘兩循例按引輸納以應支用查此項引費如撙節辦理原可無虞虧絀祇因三年來巡緝之費比前較浮以致歲歸海塘公款銀一萬兩計有二三千兩之不敷雖據各商情願補輸實非經久良圖且引鹽爲民食所必需苟價

值稍昂卽於閭閻未便鹹商爲辦課所攸賴苟調
劑未當則恐營運有虧果能節省一分浮費卽輕
一分鹽本鹽本旣輕價自平減恤商惠民端在於
此臣現在飭行鹽道分司事事核實從儉辦理總
期寬減合宜年數年用一面飭竈勤煎依期驗掣
現今市價雖平仍復預爲運濟務使商情踴躍民
食充裕不致缺鹽昂價有累商民伏祈

皇上睿鑒奉

旨覽欽此

乾隆八年閏四月浙江巡撫兼管鹽政常安奏爲
相沿陋弊應事清釐者臣悉心訪察逐一查明細
加釐剔所有裁減事宜謹開列條款恭陳

皇上睿鑒

一浙江省場所各員向來未定養廉凡一切用度皆
取足於引規耗羨之內前准部文飭行查議臣
逐加體察并行據鹽驛道趙侗敷開報分別議
定養廉各員用度皆已有所資給向有商竈捐
補陋規如仁和場每歲商捐輸費銀四十三兩

零許村場商捐硃價銀四兩三江場竈捐船價
銀二十八兩石堰場竈捐公費銀四十四兩八
錢又場書飯食銀八兩四錢場役飯食銀一十
一兩二錢鳴鶴場商捐硃費銀四兩清泉場竈
捐飯費銀五十五兩六錢龍頭場竈捐飯食銀
七十九兩零又商捐硃費銀一十二兩長林場
竈捐公費銀三百六十餘兩雙穗場竈捐陋例
銀二百一十餘兩永嘉場竈捐公費銀一百八
十餘兩以上通計銀一千餘兩相沿未革臣查

此項陋規祇因從前未定養廉是以有此捐備
今養廉旣已議給自不宜復行巧取應請一概
永行禁革毋令再取絲毫庶商竈均得免於滋
累矣

一杭嘉紹等所商鹽完課開運之後因恐商人有
中途灘包夾帶以及影射飛渡等弊是以於要
隘處所設立口次該管官員盤驗放行名爲過
門載在鹽志由來已久所以該衙門硃費紙張
以及巡役工食房租船價辦事辛資一切費用

俱於過門引鹽之上計引抽收按款開發查蘇
州府每年約過門鹽二十萬引每引收銀二分
一釐零湖州府每年約過門鹽六萬五千引每
引收銀五分六釐富陽縣每年約過門鹽二十
八萬引每引收銀一分二釐桐廬縣每年約過
門鹽二十七萬引每引收銀八釐嚴州府每年
約過門鹽二十五萬引每引收銀一分八釐以
上所收之費除蘇松巡道并蘇杭湖嚴等府廳
暨富陽桐廬二縣養廉殊費及盤驗引鹽一切

零星飯食辛資外每處歲有盈餘銀二三百兩
不等解交鹽道庫內凡關無款工食與錢塘江
救生船賞項及添補巡費俱於此項內詳明辦
理經前督臣李衛核定前數飭行遵照在案臣
查此項銀兩惟應計收量出倘將來或因從前
未經報部稍不節制必致增加一有增加必致
取償鹽價任意花銷累商困民不少臣是以敬
爲奏明卽照前數定爲規則俾引鹽無所增加
斯鹽價不致昂貴閭閻得沾實惠矣

一江南蘇屬之長洲元和吳縣吳江震澤浙省湖
屬之烏程歸安各有私鹽出沒之所向設公堂
緝查梟販於引鹽上派收掌費以爲各該衙門
紙張及巡查官快弁兵船隻房租火藥油燭飯
食薪水并各官到任賀禮節禮壽禮與各衙門
內供支醬食二鹽其費並無定數雍正五年經
前督臣李衛酌定長元吳三縣每年約計額鹽
四萬九千四百五十八引每引收銀二分六釐
吳震一縣約計額鹽一萬七十三引每引收銀

三分二釐程安二縣約計額鹽三萬引每引收銀三分一釐後因長元吳三縣支用不敷雍正九年又加增每引銀九釐乾隆四年又加增每引銀四釐令每年報銷尚有商人賠補臣查捐費資巡原爲靖私疏引起見所有巡畧各項在所必需至文武員弁賀壽等禮及醬食二鹽每年各計二三百金至四百餘金不等實屬濫取夫商稅關平課餉裕課必先恤商文武員弁已蒙

蒙

皇上賞給養廉足以資用且地方一切陋規久奉裁革
則此項規禮自應分別革除請嗣後年節壽禮
賀禮及醬食二鹽俱行禁止毋許呈送收受庶
官無濫取則商有餘力恤商裕課官方且由之
整飭矣

一杭嘉湖道金衢嚴道二缺管轄三府屬縣兼有
巡鹽之處分且差委查緝賞項辛資甚有繁費
從前歲定養廉心紅銀二千四百兩未免不敷
乾隆四五年相繼請增巡費經前撫臣盧焯批

行鹽道議覆於嘉秀善桐四縣票引及湖州桐
廬等處過門引鹽之上加捐釐許各湊解銀九
百兩以補兩道養廉之未逮臣查過門引鹽費
不宜多已於前條備議但兩道責兼巡鹽養廉
不敷實宜稍爲增益而前此所增之九百兩又
未免過多應各減銀三百兩止給銀六百兩至
各協副將亦有督緝私鹽之責均不無有藉巡
費是以杭協於鹽規項下每年支給銀二百四
十兩湖協於湖屬門費內支給銀二百四十兩

乾隆四五等年添給嘉協巡費二百四十兩係
嘉秀善桐四縣票商按引公捐紹協巡費二百
四十兩係諸義浦三縣及嵊縣商人按引公捐
嚴協巡費一百二十兩原定富桐嚴三關溢餘
引費內撥給臣查杭嘉湖紹嚴各協巡緝私販
實宜撥給巡費而斟酌允當亦應量爲減少請
將杭協湖協嘉協紹協各給銀二百兩嚴協地
處上游私販減少酌給銀一百兩此項所減各
費雖爲數無幾而錙銖悉屬商脂不無少補再

查溫州鎮協巡費亦於乾隆四五年間經前撫
臣盧焯飭議據溫所各商每引願捐四分以一
分爲溫鎮獎賞之用以二分爲樂平二協勸巡
之費以一分爲溫城守及右營巡緝之資按引
鹽之盈絀計輸費之多寡每年約銷二萬五六
千引不等原無定數分給資巡尚非過多今經
奏明酌定嗣後應給之文武各員不敢於引鹽
之上額外加增借名濫索於鹽政實有裨益矣

奉

旨知道了欽此

欽定重修兩浙鹽法志卷十一終